

**EIGHTH LEGISLATIVE ASSEMBLY OF MIZORAM
(SECOND SESSION)**

LIST OF BUSINESS

FOR THIRD SITTING ON THURSDAY, THE 14th MARCH, 2019
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **Dr. K. BEICHHUA**, Minister to lay on the Table of the House a copy each of the following :
 - i) The Juvenile Justice Fund Rules, 2018.
 - ii) The Mizoram Grant-in-Aid to Voluntary Organizations and Individuals Rules, 2018.
 - iii) The Mizoram Rights of Persons with Disabilities Rules, 2017.
 - iv) The Annual Report of the Commissioner for Persons with Disabilities Government of Mizoram for the year 2017-2018.

LEGISLATIVE BUSINESS

Bill for introduction, consideration and passing

3. **Dr. R. LALTHANGLIANA**, Minister to beg leave of the House to introduce "The Mizoram Anatomy Bill, 2019."

ALSO

to introduce the Bill

to move that the Bill be taken into consideration

AND

to move that the Bill be passed.

S.R. ZOKHUMA

Commissioner & Secretary

....

SPEAKER : Ka hming pu ka mite chuan inngaitlawma an tawngtai a, min zawna, an awm dan sualte an hawisan chuan, van atangin ka lo ngaithla ang a, an sualte ka ngaidam ang a, an ram chu ka tidam leh ang. 2 Chronicles 7:14.

Zawhna leh chhanna kan la nghal ang a. Zawhna 6-na zawt turin Pu V.L. Zaithanzama, ani hian authorise a nei em? Authorise a nei a, amaherawhchu, kan Dan 50-na angin member a kal theih lovin a zawhna hi authorised a nih chuan zawhna nungah kan pawm ang a. Amaherawhchu, zawhna dangah kan kal phawt ang a, kan zawh hman chuan a zawt thei ang. Amaherawhchu, a zawt hman lo a nih pawhin zawhna nung a nih avangin part of procedures-ah a awm nghal ang. Tichuan 7-na zawt turin member zahawm tak Pu F.Lalnunmawia i lo sawm ang.

Dr. F. LALNUNMAWIA : Pu Speaker, ka lawm e. PWD changtu Minister zahawm tak chhan atan ka zawhna chu :

Hmuifang to Chawilung kawng leh Sialsuk to Sailam kawng siam mek hi engtika zawh tur nge tih a ni e.

SPEAKER : Chhang turin a changtu Minister, Chief Minister zahawm tak i lo sawm ang.

Pu ZORAMTHANGA, CHIEF MINISTER : Pu Speaker, member zahawm tak Pu F. Lalnunmawia zawhna chhanna chu :

Hmuifang to Chawilung hi ni 27.11.2019-a zo tura ruahman a ni a. Tin, Sialsuk to Sailam kawng siam mek hi ni 22.09.2019-a zo tura ruahman a ni e.

SPEAKER : Zawhbelhna a awm em?

Dr. F. LALNUNMAWIA : Pu Speaker, ka lawm e. Sawlai Aizawl South III bial chhung tuna kan sawi tak Hmuifang to Chawilung kawng, Sialsuk to Sailam kawng te saw MNF sorkar hmasak hun laia laih tlang ve ve an ni a, tunah kum 10 hnuah MNF sorkar thar hnuaiiah bawk kawng chhuat phah hna PCC-a siam tur a ni leh a, chumi hna thawh a ni leh ta hi lawmawm hlein ka hria a. MNF sorkar hmasa tih, MNF sorkar

tharin an chhunzawm leh hi lawmawm ka ti a. Tin, chutih rual chuan a kawng siam hna saw tun fur hmaa zawh hman hram ni se kan duh khawp mai a. Nikum lamah kawng a chhiat nasat avangin damlo te a zawnin an zawn a, motor a kal hleitheh lova. Khatiang kha a thlen tawh loh nan a bik takin Lamchhip to Chawilung inkara GSB phah tal hi min zawh sak thei ang em? Tin, Sailam kawng pawh fur chhiat lutuk hmain motor tan kal harsa lutuk lova zawh theih a ni ang em tih ka zawh belh e.

Pu ZODINTLUANGA RALTE : Zawhbelhna. Tuna Hmuifang to Chawilung leh Sialsuk to Sailam kawng an siam mek hi engtik financial year a pawisa dah nge tih min hrilh thei em ?

SPEAKER : Pu C. Lalsawivunga, a tawpna a ni ang.

Pu C. LALSAWIVUNGA : Pu Speaker, PWD changtu Minister-in a chhan tur a ni tho a, a in relate tho in ka hria a. Assam Rifles ram hnuai lamah PHE site office atanga Bawngkawn, ITI road pawh tura kawng thar siamna tur 2018-2019 ah khan nuai 127 dah a ni a. Hei hi divert niin ka lo hria a, enge a chhan? Khawiahnge nuai 127 kha hman a nih tih ka zawt e.

SPEAKER : Chhang turin Chief Minister kan sawm ang a, a karakik deuh hlek a, a chhan theih ang ang chhang turin i lo sawm ang.

Pu ZORAMTHANGA, CHIEF MINISTER : Pu Speaker, zawhna hnukung ber kha chu a karakik em mai a. Information hi kan sawi ang khan keimahni project siama work order inchhawpa kal kha kan ni lova. A hnua bung kan nih avang hian khawiahnge kan NEDP sum leh khang kha thehdarh a nih tih lam kha kan hre kim bik lova, divert leh divert loh lam kha nakinah thil dangah zawhna te rawn zawt sela, a zawhna ah hian in concentrate deuh hlek ila a thain ka hria. Chutilo chu kan chhan sual palh a hlauhawmin ka hria. Inrawn vek hman a ni si lova, kha kha chu nakinah tlema kan inbuatsaih deuh hnuah duh leh pawnlam ah pawh inzawh chian ni se a thain ka hria.

Member zahawm tak Pu Zodintluanga zawhna kha tunah financial year thar kan la nei lova, 2018-2019 financial year kha a ni lo thei lova. Chuvangin, khata tanga lo kal kha a ni lo thei lova. Tin, chulovah chuan

Hmuifang to Chawilung te, Sialsuk te, Sialsuk to Sailam kawng te kha kan sawi ang khan ni 27.11.2019 hmaa Hmuifang to Chawilung kha zo tura tih a ni. Mizoram Technocrats Company Pvt. Ltd., te thawh hi a ni a. Tunah hian GSB 6 km. leh Sialsuk concrete 1 km. an zo tawh a. Hna an chhonzawm mek a, theih ang tawka thawk chak turin kan hrilh a, kan lo nawr zel ang a, thawh chak kha a tul khawp mai. Member zahawm takin a sawi kha kan lo hria ang a, hma kan lo la ang. Chutiang bawkin Sialsuk to Sailam pawh kha NECS hna a ni a, September ni 22, 2018 ah hna tan a ni a, a la reilo deuh a. Tichuan, ni 22.09.2019 kum khat chhunga thawk zo tura tih an ni a. Amaherawhchu hna hi an tan tlai deuh hlek a. An hmanrua te an in lakhawm a, an thawk mek a, reiloteah GSB hi phah theih beisei a ni. Anni pawhin a chak thei ang bera hna thawk turin department lam atang pawhin kan lo nawr ang e.

SPEAKER : Starred Question no. 8-na zawt turin member zahawm tak Pu Vanlaltanpuia i lo sawm ang.

Pu VANLALTANPUIA : Pu Speaker, ka lawm e. Ka zawhna chu - Lunglei District Sesion Court Office hmun tur tihfel a ni tawh em?.

SPEAKER : Chhang turin Law & Judicial Department changtu Minister zahawm tak Pu T.J. Lalnunluanga i lo sawm ang.

Pu T.J. LALNUNTLUANGA, MINISTER : Pu Speaker, member zahawm tak Pu Vanlaltanpuia zawhna chhanna chu :

Lunglei District Court hmun tur hi tih fel a la ni lo tih a ni.

SPEAKER : Zawhbelhna, zawhna neitu i lo sawm ang.

Dr. VANLALTANPUIA : Pu Speaker, kan sorkar hian separation of judiciary hi kan ngaih pawimawh avangin tunah hian Lunglei District Court hi D.C. Office Complex-a la awm a ni a. Hetah hian Judge 7 an awm a, ukil hi 40 chuang an awm bawk a. An tawt em em a, an building hian a accommodate lo hle a. Tunah hian a dawrtu te nen buaithlak takin hun an hmang tih kan lo hria a. Tin, a hmunhma hi kan zawng mek niin ka hria a, tunah hian an earmark deuh chu Lunglei-a Ramthar Veng lamah te, khing Pukpui lampangah te a ni a. Pu Speaker, a remchan chuan he sorkar hian hun lo kal zel turte ngaihtuahin traffic

problem-te enin Lunglei North lamah te hian dah theih a ni dawn em? Kan lo welcome viau a ni tih ka sawi duh a. Khi lamah khian kan welcome a, min dahsak thei dawn em tih ka han zawt leh a ni e.

SPEAKER : A dang a awm lo maw ? A nih Minister chhan tir ang aw, han chhang sela.

Pu T.J. LALNUNTLUANGA, MINISTER : Pu Speaker, District Court chungchang leh a Court hrim hrim function hi he sorkar kan Chief Minister zahawm tak kaihhruaina hnuaiah hian judiciary ngaih pawimawhna avangin Court hmun tur zahawm tak leh area tha tak tunah hian zawn mek a ni a. Chutianga tur chu he sorkar hian a mitthla a, chutianga hmun rem awm thei tur ang ah chuan theihtawp chhuahin sorkar pawhin a lo enzui ang tih kha ka chhanna a ni e.

SPEAKER : Starred Question no. 9-na zawt turin member zahawm tak Pu K.T. Rokhaw i lo sawm ang.

Pu K.T. ROKHAW : Pu Speaker, ka zawhna Starred Question No. 9 PWD Minister zahawm tak chhan atan :

Tlabung kawng National Highway No. 302 thawm that hna hi zawh fel a ni tawh em?

SPEAKER : Chhang turin Chief Minister zahawm tak Pu Zoramthanga i lo sawm ang.

Pu ZORAMTHANGA, CHIEF MINISTER : Pu Speaker, member zahawm tak Pu Rokhaw-a zawhna chhanna chu hetiang hi a ni e :

Tlabung kawng National Highway No. 302 hi thawmthat a ni a, a hna hi zawh fel a la nilo deuh tih hi a chhanna a ni e.

SPEAKER : Zawhbelhna, Pu Nihar Kanti Chakma, member zahawm tak i lo sawm ang.

Pu NIHAR KANTI CHAKMA : Pu Speaker, ka lawm e. Lunglei to Tlabung kawng National Highway 302 hi kan bial mipui tan chuan lifeline a ni a. Hemi kawngah hian leilawn 2 a awm ve a, Phairuankai leh Tuichawng leihlawn a ni a. A chhe em em a, heng leilawn pahnih

te hi siamthat tumna a awm em ? Tunah hian contractor hna thawk mek hi an awm em? Contractor-te hming hi min hrilh thei em? Estimated amount hi engzah nge ni ? Engzat percent nge hna hi an zawh tawh? Fur hma hian an zo thei ang em? National Highway 302 hi widening tumna a awm em tih ka rawn zawt e.

SPEAKER : Pu B.D. Chakma, a bak a theih tawh loh, in tlai tlat.

Pu B.D. CHAKMA : Pu Speaker, ka lawm e. Ka zawhbelhna chu Chhengkhum to Chawngte hi World Bank road a ni a, hmannia ka kal lai khan Assistant General Manager kha ka hmu a. Ruantlang-ah electric ban leh tui pipe hi sawn tur a ni a, an sawn loh avangin work progress chu a theih chiah loh. Chuvangin, company lam atangin hetah fund release turin an rawn dil a, concerned Department-te hnenah Electricity leh PHE Department-ah pawisa chu PWD-in an tum tur angin an sawi a SGM in. Chuvangin khami electric ban leh tui pipe connection sawn chhuahna turin pawisa hi Deparement kutah an release tawh em tih ka zawt e.

SPEAKER : Tlabung kawng lo deuhte zawh a ni a, chhan theih ang ang chhang turin Chief Minister zahawm tak i lo sawm ang. Niminah kan sawi tawh a, supplementary zawhna pahnih kan la phawt ang, hei a la tam si a, chhang phawt rawh se. I zahawm viau naa a theih tawh loh.

Pu ZORAMTHANGA, CHIEF MINISTER : Member zahawmtak Pu Rokhaw pawh khan a lo hriatthiam ve a ngai a. Tunhma kha chuan zawhna pahnih vel khan zawhna period hi kan zo deuhthaw thin a, kan zawt luih luih mai a, a hnuhnung lam khan zawhna an zawt ve hman lova. Chuvang chuan kan Speaker-te rorelna hnuaiyah a vaia zawhna kan chhan theih nan pahnih bak chu i zawhbelh lo ang u an lo ti tawh a lo nia. Keini ho khan kan lo hre lova, chuvangin kan Speaker-te rorelna kha kan han kalpui a ngai a, a lo hriatthiam kan beisei a ni.

Zawhbelhnaah khan National Highway 302, Lunglei atanga Tlabung hi km 94 vel a ni a, tunah hian a hna pui chu a kal dawn a. Mahsela, thawmthat hna chumi chhung chuan kan lo thawk a, emergency-in kan pawisa hmuh theih ang ang la khawmin furchhia-a a

kal theih hram hram nan tiin thawmthat hna kan thawk a, kan bei tlah tlah a. Chu chu keimahni state level-a kan hmalak theihna china kan tih a ni a.

Tin, Tlabung kawng contract hna hi package thumah then a ni a. Package khatna hi Pu P.C. Lalthantluanga, Lunglei Venglai-in a thawk a. Package hnihna hi Vanlalhluna, Edenthur, Aizawl-in a thawk a. Package thumna hi GP Project Limited, Silchar-in an thawk a. Tun thlenga thawh tawhah chuan package khatna chu an zo tawh a. Package hnihna hi 75% vel a la awm a. Package thumna hi khua a that a rokhawlhna dang a awm loh chuan tun thal chhunga zawh theih beisei a ni a, 98% vel chu thawh tawh a ni.

Tin, zawhna dang pakhat kha tlemin a inpersan deuh hlek a. Lei pahnih chungchang thu kha tun tum Delhi-a kan zin pawh khan Phairuangkai lei kha chu kan nawr nasa khawp mai a. Dawh a nih loh chuan a rei tawh lutuk a, khu khu a hlauhawm em mai kan ti a. Khutah thuneitute hnenah pawh kan project thehluh tawh leh dawh ngei a nih theihna turin keimah ngei pawhin kan Chief Engineer te nen nasa takin Delhi-ah kan nawr a. Khang kha chu nawrchhuah theih ngei kan tum a. Tin, lei pakhat zawk kha chu a kawng in a rawn ken tel ah dawh tura tih a ni bawk a.

Tin, electric ban chungchang thu kha chu P & E lamah pawisa te pawh pek fel tawh a ni a, an rawn tih thuai theih kan beisei a ni. Tin, tunah hian National Highway 302 kha chu MORTH-ah pawisa a awm a, kawng tha taka siam tuma hma lak mek a ni e.

SPEAKER : Zawhna 10-na zawt turin Pu Ramthanmawia i lo sawm ang.

Pu RAMTHANMAWIA : Pu Speaker, ka lawm e. Home Minister zahawm tak chhan atan :

- a) Dungtlang Check Post/Out Post hi Police Station puitlinga hlan kai tumna a awm em ?
- b) Awm ta se, engtikahnge tihpuitlin theih a nih ang ?

SPEAKER : Chhang turin a changtu Minister zahawm tak Pu Lalchamliaana i lo sawm ang.

Pu LALCHAMLIANA, MINISTER : Pu Speaker, Dungtlang khi junction pawimawh tak a nih avangin Out Post awm mek khi station puitlingah hlankai tum mek a ni e. Amaherawhchu tihpuitlin theih hun tur hi hriat a la ni lo.

SPEAKER : Zawhbelhna, a neitu.

Pu RAMTHANMAWIA : Ka lawm e. Dungtlang Police Out Post hi MNF sorkar hmasa 2004-ah khan a tul em avangin Champhai atanga va dah a ni a, temporary tak a ni. Tichuan, hun a lo kal zel a, ka bial chhungah khian khaw 26 a awm a, 26 atanga khaw 23-in he Police Out Post hi an ring a. Tichuan 2013 khan khatih hun laia Parliamentary Secretary Home, Pu Lalrinmawia Ralte pawh khan upgrade na tur lung a phum a ni. Amaherawhchu tihpuitlin a ni ta lo va, tun hi kan thleng a. He lai Police Station a pawimawhna chu sawi vak pawh ngai lovin ramri ah kan awm a, thil tha tam tak a chhuak a, thil tha lo tam tak a chhuak a, a lut bawk a. Chuvangin he hmun hi tihpuitlina upgrade thuai hi a ngai hle mai a. Hun kalta te pheikha chuan VC te mangang hian Police mamawha an koh changin lirthei an nei bawk si lo va, private motor an hmang a, ₹ 1500, ₹ 2000 te an chawi thin a ni, a kotu apiang khan. Chutiang chuan harsatna hi an lo tawk rei tawh khawp mai a. Amaherawhchu tun sorkar thar hian kan Chief Minister zahawm tak leh kan Home Minister zahawm tak leh Police Department-a hotute he harsatna hi kan han hriattirin kan han ngen a. December ni 15-a thutiam kan lak atanga December ni 30, Pathianni khan kan manganna te leh harsatna te min hriatpuiin Bolero pakhat leh O.C pakhat min pe ta a ni. Kan lawm hle a. Kan bial chhung mipuiten sorkar thar chungah lawmthu an sawi nasa a ni. Chungte avang chuan helai bial tan khian tuna kan Home Minister zahawm takin a rawn chhanna kha a lawmawm hle mai a, hemi tihpuitlinna tur hian sum tam tak a la ngai dawn a, chungte pawh chu kan House Leader zahawm takin min lo hriatsak sela. Khilaia hun rei tawh tak atanga harsatna kan neih hi min hriatpui a, sum leh pai pawh min dah sak turin ka ngen a. Tin, tun thut thuta a theih loh pawhin a hma thei ang bera min dahsak turin ka ngen nawn leh a ni. Zawhna kha chu kha ka zawt a, a rawn chhang tawh a,

engtik hunah nge tih erawh kha chu a hma thei ang berin min tihsak rawh se tih ka rawn ngen nawn leh a ni. Ka lawm e.

SPEAKER : Pu Andrew H. Thangliana a phar hmasa zawk.

Pu ANDREW H. THANGLIANA : Pu Speaker, ka lawm e. Khilai hmar tlangdung, (Lungdai atangin sawi zawk mah ila) Serkhan to Bagha inkar Saipum tih chho zawng zawngah khian Police Out Post pakhat pawh tun thleng hian a la awm lo va. Khua eng emaw zat khilalah khian kan nei ve a, Serlui te pawh zu bial thla zelin Kolasib area te pawh a tel ang a. He lai tlangdungah hian Out Post dah tumna a awm em tih hi ka zawhna a ni, Home Department lam chhan turin.

SPEAKER : Member zahawm tak, Pu C. Lalsawivunga.

Pu C.LALSAWIVUNGA : Pu Speaker, ka lawm e. East Tuipui bialtu zawhna chhanna kha kan hria a, a lawmawm hle a. Kan ngaihthlak ang khan international boundary bula awm an nih avangin buaina leh harsatna ri thut te hi a lo awm thin a. Chuvang chuan Police Out Post-a duty te hman tur lirthei khilai Dungtlang Out Post-ah khian dah a ni thei em tih ka zawhna pakhat a ni a. Tin, khilai outpost mai ni lovin Mizoramah Police Station hrang hrang kan nei a, henga duty police-te hman tur hi lirthei engzat nge kan dah theih ?

SPEAKER : Chhang turin Home Minister zahawm tak i lo sawm ang.

Pu LALCHAMLIANA, MINISTER : Pu Speaker, member zahawm tak ten kan hriat tlan atan tunah hian Police Station pangngai hi 38 kan nei a, chu bakah chuan Cyber Crime te, ACB te, Special Narcotic Cell te nen chuan 41 kan nei mek a. Chutihlaichuan hmun 4 hmun 5 vel atangin Police Station dah tura ngenna hi kan dawng mek a ni.

Tin, Tuirial bialtu zahawm takin Serkhan Bagha road tlangdungah Police Station a awm lo a tih kha a dik viau va, amaherawhchu, a tawp ber Saiphai-ah khuan tunah hian Police Out Post te tak te chu a awm mek a. Police Station puitling han dah hi sum leh pai tam tak ngai ve a nih avangin thawk leh khatah chuan an duhna zawng zawngah chuan kan tihhlawhtlin theih chu ka ring lo, amaherawhchu theihtawp chhuahin kan bei zel ang a. Dungtlang hi a rawn ti hmasa an ni a, kan han take up hmasa a, hlawhtlin ngei

pawh kan inbeisei a. Finance lamah a thang mek a, engtin tak rawn ti ang maw tih hi kan ngaichang a ni.

Tin, Aizawl South I member zahawm tak zawhna kha, Dungleang chuan a bial tupa in a sawi ang khan Bolero pakhat chu kan dah e. Tin, hmun dangah pawh Gypsy hlui tak te, tha vak lem lo te, hmun thenkhat laiah phei chuan whatsapp video in dawng mai thei a ni Kawrthah ami pawh duty-a an chhuak kha nawr ngai khawpin a awm a ni tih te pawh in hmuh ka ring a. Amawherawhchu, a hming chuan motor chu a awm a, an tha vak hlawm lo va, hei hi kan rilruah a riak nasa khawp mai a, eng tin tin emaw tan lain tun aia lirthei tha zawk Police Station-ah dah hi kan rilru ah a awm a ni tih kan sawi kai a nih chu. Ka lawm e.

SPEAKER : Starred Question no. 11-na zawt turin Dr. Z.R Thiamsanga, member zahawm tak i lo sawm ang.

Dr. ZR. THIAMSANGA : Pu Speaker, ka lawm e. PWD changtu leh kan Chief Minister zahawm tak chhan atan ka zawhna chu: Seling to Champhai inkar kawng hi double lane-a laih zau emaw, siam tumna a awm em tih a ni.

SPEAKER : Chhang turin PWD Minister zahawm tak i lo sawm ang.

Pu ZORAMTHANGA, CHIEF MINISTER : Pu Speaker, member zahawm tak Dr. Z.R Thiamsanga zawhna chhanna chu : Awm e. Feasibility study leh preparation of DPR for 2-laning of Champhai-Seling road, Champhai – Seling, hi 2-lane a siamna turin Ministry of Road Transport & Highway, New Delhi-ah thehluh tawh a ni a, kan theih tawkin kan um char char mek e.

SPEAKER : Pu Vanlalhlana, member zahawm tak i lo sawm ang.

Pu VANLALHLANA : Pu Speaker, zawhbelhna pakhatna, kan House Leader biala khaw pawimawh tak Sihphir khaw panna kawng khi a tha lo em em mai a, a bikin Durtlang North atanga Sihphir kawng. Kawng a chhuk chhova, a te bawk si a, accident te a hlauhawm em em mai a. Khi khi laih zauh tumna a awm em? A dawt leh ah chuan Thuampui atanga Sihphir panna bawk, metal kawng chhe tawh em em khi repair theih a ni em? Repair tumna a awm em? Pathumnaah chuan khilai Thuampui road-ah khian school

tha deuh mai a awm a, Aizawl atangin an pan nasa a. An kal dan hi Thuampui lama kual lovin Durtlang kaltlang vekin a ni ta a. Durtlang a kawngpui zuk pawhna khi a te em em a, a chhuk chho si a, a hlauhawm em em mai a. Motor hi a za telin a kal a ni tawh si a, khing te khi min enkawlsak thei em? Min laih zauh sak thei em tih kha ka zawhna a ni e.

SPEAKER : Zawhna neitu Dr. Z.R Thiamsanga i sawm ang.

Dr. ZR. THIAM SANGA : Pu Speaker, ka lawm e. Champhai kawng khi kawng pawimawh tak, international boundary kawng pawimawh tak leh international trade hmun pawimawh tak, kawng pawimawh tak a ni a. Tun kan sorkar tharin ruahmanna khatianga a lo siam hi a lawmawm hle a. Chuvang chuan kan Chief Minister zahawm tak a changtu leh Transport Minister te, kan sorkar chungah lawmthu sawi ngaiin ka hria a ni. Tichuan , khi kawng khi kan hriat angin double lane a ni lo chung chung khian double lane-a tlan thin truck, nitin a chhuk lam khi 50 vel, a chho lam khi 40 vel a tlan thin a, motor ke 12 nei te a tlan thin a ni.

Chuvang chuan kan kawng khian a dawl lo hle a, hmanni lawkah pawh khan (nimin ah ka sawi tawh a) Chapchar Kut hmangin kan han kal a. Keifang leh Khawzawl inkar ringawtah pawh khian motor lian 10 lai mai kawngsirah an lo tlu a, an inpelhna lamah. A then phe chu kawng thlang lamah te, pakhat phe chu a accident hial a. Chutiang chuan khi kawng khi a zim a motor tlan a tam si a, kawng pawimawh a ni a. Champhai District mai ni lo, Mizoram pumin chakkhai kan lakna kawng pawimawh tak a ni a. Chuvang chuan khitiang ruahmanna kan sorkar chak takin a han siam hi a lawmawm hle. Kum 10 lai kan lo tuar tawh a. Chutihlai chuan ka zawh duh chu, double lane siam a nih khan nakinah chuan kawngte a lo min ang a, kawng pakhat mai khan a kal theih dawn lo a. Tunah khian Keifang to Hliappui sial chhuah a ni tawh a. Chuvang chuan khami kawng pahnih han awm thei tur, (khami siam chhung khan kawng min leh kawng block te pawh a lo awm thei a, khitiang kara motor lo kal ve theihna tur) Hliappui to Rabung peng te khi kan hotute hian min lo hriatsak se a va tha dawn em ka ti a ni.

Tichuan, kawng han chhiat tawh zia chu Pu Speaker, i phal chuan a thla te pawh ka rawn la a ni. Hetiang hian motor hi a let rem rum mai a ni. An khawngaihthlak a, driverte leh motor neitute pawh an khawngaihthlak em em a, an lainatawm a ni. Chuvang chuan hetiang a sorkarin ruahmanna tha tak hun

reilote chhunga a han siam hi a lawmawm hle a, lawmthu ka rawn sawi nghal baw a ni e.

SPEAKER : Zawhna dang a la awm em? Pu Lalduhoma, member zahawm tak.

Pu LALDUHOMA : Pu Speaker, New Serchhip-ah khian National Highway Division hmun tura building nen peih a ni tawh a, S.E. office awmna tur a ni a. Amaherawhchu S.E. hmel hi hmuh a la ni lo a, J.E. pakhatin Aizawl atangin a hmui a ni. Building sak zawh tawh a ni a, a chhe lemlo a, mimal ten an luah mai mai a ni. Khi khi a nih dan tur ang taka S.E. hian a rawn luaha a function theihna turin rang takin hma min laksak thei ang em?

SPEAKER : A in karkik hle mai. Seling to Champhai atangin Sihphir, Thuampui, Serchhip, chhan theih ang ang chhang turin Chief Minister zahawm tak i lo sawm ang.

Pu ZORAMTHANGA, CHIEF MINISTER : Pu Speaker, ka lawm e. Member zahawm takte zawhna Sihphir to Durtlang, Durtlang to Sihphir ti ta zawk ila, hei hi ka bial kawng pawimawh, a bial, a khua amite leh a veng amite pawhin an ngaih pawimawh ber a nih avangin theihtawpin hma kan la a. Tunah hian Delhi lam atangin (a zat chiah kha ka hre ta lo a) vaibelchhe 50 bawr vel, 55 tih bawr vel a ngai a. Khi khi concrete-a siam tum a ni a, chu chu a principle-in approval min pe tawh a. DPR te uluk takin kan han siam ang a, a amount dik tak thehlutin khi khi min remtih sak tawh a. Tun thal lo awm leh tur October/ November chho velah chuan hna tan theih tawh kan in beisei a.

Sihphir - Durtlang inkar kawng hi a buaithlak em em a, a chhan chu BRTF enkawl, an kalsan tawh, maintain titih, an maintain that duh vak loh Durtlang road tun hmaa kan problem ang group ami kha a ni a. Engemawti taka nasa taka beih loh phei chuan a fund hmuhchhuahna tur pawh kha a laklawh vek mai a. Mahse theihtawpin kan bei a, tunah hian Sihphir kawng chu a principle in approval neih a ni a. Thal lo awm leh turah hian kan tan nghal phat theih kan in beisei a ni.

Tin, Durtlang atanga Selesih lam kawng lo kal chhuk rawn pawh thlakna tur kawng khi a pawimawh khawp mai a, khi khi hma thar lakna turah thil pawimawh niin ka hria a keima mimal pawhin. Chuvangin financial year

tharte lo thleng sela, khi khi kan theih tawpin tihthata improve, siamthat kan lo tum dawn nia.

Tin, chulovah chuan Thuampui - Selesih kawng kal phei hi (mahni bial a ni baw k a, a kal zing pawl tak pawh tun hnaiah chuan ka ni ang a) a chhe khawp mai a. Hma lakna turin pawisa pawh kan dah a, tunah sawn thawk tan turin an bei mek a. Kan theihtawpin helai phei hi chu siam that tumin pawisa pawh financial year liam mekah hian kan dah hman a, hei hi an thawk dawn mek e. Amaherawhchu thawh dawn hian road roller-te, thil dang han in lak khawm te a lo ngai ve a, kan theihtawpin hma lak chak kan tum tih ka sawi duh a. Member zahawm tak Pu Duhoma'n Serchhip-a S.E. awmna tura ruat a function thei ang em a tih kha kan han en ang a. A pawimawh a, khatianga ruat na na na, District Headquarter a ni a, kan theih ang tawka function tir hma kan lo tum ang e.

Tin, ka sawi belh leh duh chu a main question ami Champhai - Seling road chungchangah kha chuan two lane tur atana tih kha a DPR hi K & J Project Limited, Nagpur ten an siam a, Ministry of Road Transport & Highway lamin alignment pawmpuina leh DPR pawmna an la ti fel lo deuh hlek a. Tin, he kawng hi Bharatmala Pariyojana Scheme hnuaiyah dah a ni a, National Highway Infrastructure Development Corporation Limited (NHIDCL) enkawl turin central sorkar chuan a dah a. Tichuan ni 8.2.2019 khan tripartite supplementary agreement Ministry of Road Transport & Highway te, tin, NHIDCL leh Consultant MS & KJ Project Private Limited te khan an pathuma inremna an siam leh a, a tul anga DPR siam that hnuah leh pawm fel hnuah land acquisition leh tender hna thawh zui turin Champhai kawngah khan hma lak mek a ni a.

Tin, member zahawm tak a zawttuin a sawi ang khan lehlamah Keifang lam atanga khitah Hliappui lama kal chhoa Champhai hmar lama kawng lo chhuak tur eng emaw zat chhuak chho tawh an chhunzawm a. Kaltlang chhoh theihna khi chu a pawimawh em em mai a, kawng shortcut tha tak a ni. Tam tak phei chu sial vak ngai loa hman nghal mai theih, a then phei chu eng emaw chen black top tawh khami han belh chhoha kal tur a ni a. Khi khi kan ngaihpawimawh a ni a, kan theih ang tawka hmalakna tura kan ngaih, kan ngaihpawimawh a ni e.

SPEAKER : Starred Question No-12 na zawt turin member zahawm tak Pu Andrew H.Thangliana i lo sawm ang.

Pu ANDREW H.THANGLIANA : Pu Speaker, ka lawm e. Minister zahawm tak PWD changtu chhan atan :

- a) NEDP Works, Kawnpui – Buichali kawng siam hna nikum 2018-a hnathawhna atan hian sum engzatnge ruahman a nih?
- b) Contractor hian hna a thawk zo tawh em?
- c) Siam zawh tawh a nih chuan tun ni hnih khat ruahtui tla vanga motor la tang reng si hi enge a chhan ?

SPEAKER : Chhang turin a changtu Chief Minister zahawm tak i lo sawm ang.

Pu ZORAMTHANGA, CHIEF MINISTER : Pu Speaker, member zahawm tak Pu Andrew H.Thangliana zawhna chhanna chu :

- a) NEDP Works, Kawnpui-Buichali kawng siam hna nikum 2018-a hnathawhna atana sum ruahman zat chu ₹ 252.33 lakh a ni.
- b) Contractor hian hna a la thawk zo lo.
- c) A hnathawktu contractor hian a la thawk zo si lo va. Chumi chhungin keimahni state pawisa atangin (thawktuin a la thawh zawh loh avangin) ‘keimahni talin a neitu kan ni a, i lo zuk thawk teh ang’ an ti a. Crore eng emaw zat nen an lo zuk bung ve a, cement concrete-a siam an tum a. Amaherawhchu an la siam zo hman si lo va, a la reilo em lah tak a. Khami a siamna tura an laih khuar, an la hnawhkhah hman si loah tunhnai ruahsur khan arawn sur hnan avangin khang khan harsatna min pe a ni e.

SPEAKER : Zawhna neitu zawhbelhna.

Pu ANDREW H. THANGLIANA : Pu Speaker, khulai kawng khu kan Chief Minister hian a ngai pawimawh em em mai a. Nikum kum tawp lam sorkar siam atanga kar 2-na velah khan (krismas leh kumthar inkar a ni mahin ka hria a) member zahawm tak Pu Ruatkima leh official-te nen

khulai National Highway 306 khu an zuk enfiah a, hma la nghal tur khan an zuk kal nghe nghe a.

Zawhbelhna hi point 3 ka nei a, khulai hna khu a hmain contractor Pu Zoremthuanga'n a thawk thin a. Tun session kan tan ni, ni 11 mai khan Department lam atanga ka hriat danin contractor hi Gayatri Company ho hnena hlan thut niin ka lo hria a, hei hi a tak a ni em tih hi ka zawhna a ni a. Engvanga hlan chhawng nge a nih? Pahnihnaah chuan contractor hmasain hna thawh nana senso engzatnge sorkar hian a pek? Pathumnaah senso pek a nih hnu original estimate atanga sum la bang hian thawh zawh theih beisei a ni em tih hi ka zawt a ni.

SPEAKER : Zawhbelhna dang a awm lova, chhang turin Chief Minister i lo sawm ang.

Pu ZORAMTHANGA, CHIEF MINISTER : Pu Speaker, Department lamin information min rawn pekah hian he hna contractor hi Pu Lalhmingliana, Ramhlun South tih a ni a. Amaherawhchu a hna kha a la thawk lo a. Kawnpui – Khamrang inkar patch repair alkatra luan hi a bik takin 9550 sq.m la thawh loh a ni a, a bak zawng chu a thawk zo tawh a. Alkatra luanna tura lung lo phah tawh sa, alkatra la luan hman loh te hi motor-in a lo dai chhe leh thin a. Chuvang chuan lung lo phah mam tawh sa te pawh hi motor-in a lo rap chhe ve leh thin a. Tin, NEDP atanga siamna tur kha 623 lakh (crore 6.23) dah a ni a, sanction pawh hmuh tawh a ni a. Chu chu tunhnaia kan han tih kha a ni a. Hetah hian a chhe zual lai te cement concrete-a hmun 14 laiah phah tura ruahman a ni a. Tin, a then lai laiah lung te pawh zuk vawm luha chutia tih turin kan ti a. Tin, Ratna Infrastructure Private Limited-in a hnapui kha thawk mek in alkatra repair hna, a then chu a hmaa thawktu Lalhmingliana hian a thawk zui ang a.

Tin, ka han sawi duh chu khulai kawng khu kan ngaih pawimawh em avangin a thawktu hmasate khan an thawh that tawh loh avang leh a chhe zual lai khu cement concrete tala siam kan duh si avangin krismas hnu lawka kan zuk kal pawh khan kan han ti rup rup a. Kan sum neih atang khan i ti ang kan ti a, crore 6 lai kan han dah a. Tichuan an han thawk ngat ngat a. Amaherawhchu an la thawk zo hman hauh lo a, a hna a pui si a. Chumi chu an thawh zawh hmain an lo laih khwar concrete an tihna tur te kha ruahtui tlak avanga diak leh ta, motor tang te pawh kha a ni a. Tin, a hma khan a thawktu

tura kan tihte khan an thawh that theih loh avangin Ratna Infrastructure ho kha thawh tir an ni a. Tin, a thawk hmasa hnenah khan eng emaw zat phe chu pek a ni a. Amaherawhchu helai hi thil pakhatath chuan kan lifeline ber a nih avangin keini pawhin kan zuk tuihnih a. Khami contractor ten an tih pangngai bak kha a thenlai hi kan lo thawhpui ve a, hnatlang kan zuk neih belh a ni ber mai a, a pawimawh si a. Chuvangin khata a thawktu ten an tihthat tawh loh te kha enin keimahnin state atang pawhin chhonzawm zel kan tum mek a ni.

SPEAKER : Starred Question No. 13-na zawt turin member zahawm tak Pu Lalduhoma i lo sawm ang.

Pu LALDUHOMA : Pu Speaker, Commerce & Industries Department changtu Minister zahawm tak chhan atan :

- a) Serchhip bazar-a electric wiring hi repair tumna a awm em ?
- b) Serchhip bazar tan hian zunin siam belh tumna a awm em ?
- c) Serchhip bazar hrula PWD Quarter hi la telin bazar thar tur ruahmanna a awm em tih ka zawt e.

SPEAKER : Chhang turin a changtu Minister zahawmtak Dr.R.Lalthangliana i lo sawm ang.

Dr. R. LALTHANGLIANA, MINISTER : Pu Speaker, member zahawm tak Pu Lalduhoma zawhna chhanna chu :

- a) Serchhip bazar a electric wiring hi repair tura hma lak mek a ni.
- b) Serchhip bazar tan hian zunin siambelh tum a ni.
- c) Serchhip bazar hrula PWD Quarter hi la a bazar thar tur ruahmanna tun dinhmunah chuan a awm lo.

Chutih mek lai chuan ka han sawibelh duh lawk chu, Serchhip market sazawrhna building bik hi sakthat tum mek a ni. Heta tan hian sum pawh ruahmanna neih sa a awm e.

SPEAKER : Zawhbelhna, Pu C. Lalmuanpuia, member zahawm tak.

Pu C.LALMUANPUIA : Pu Speaker, ka lawm e. A inkarkik deuh hlek nain bazar chungchang sawi lai hian ka rilrua lo awm a awm a. Aizawl

bikah heng kawngsira bazar, chawhmeh zuarte leh sa zuar ho tan hian felfai deuh zawka ruahmanna a awm thei ang em? Thianghlimna kawngah a pawimawh em avangin eng ruahmanna nge kan neih tawh tih ka zawhbelh a ni e.

SPEAKER : Zawhna neitu member zahawm tak Pu Lalduhoma, sawm ang.

Pu LALDUHOMA : Pu Speaker, zunin chungchang leh electric wiring chungchangah hma lak tum mek a nih thu kan ngaithla a, a lawmawm khawp mai. Amaherawhchu District Headquarter ni ve lem si bazar khi a ho lam lutuk a, an tawt a, a tawp a, an leng lo a. Tuna bazar pangngai area-ah khi chuan tunlai huna bazar kan tih ang han sak hleih theih khi a ni lo deuh hlek a. Chuvangin PWD quarter a sir ami khi han la tel ila chuan parking-te pawh awmin bazar pangngai tak, District headquarters in a neih ve awm hi dah theih a ni dawn a. Chumi atan chuan ruahmanna a la awm chiah lo nain Department dang pawh a involve dawn avang leh khawtlangin hei hi an duh em em a nih avangin, PWD quarter khi la telin DPR-te pawh siamin bazar changtlung tak ruahmanna tun atang hian min kalpui tan thei ang em tih ka zawt e.

SPEAKER : Zawhbelhna, member zahawm tak Pu Vanlalhlana.

Pu VANLALHLANA : Pu Speaker, ka lawm e. Leitan-ah khian bazar tha tak kan nei ve a, amaherawhchu hun lo kal zelah a lian tawk ta lo a. A chungah khian chhawng khat zawm remchang tak a awm a, kan Minister hian min zawm sak thei ang em?

SPEAKER : Minister zahawm tak a theih ang ang chhang turin i lo sawm ang.

Dr. R. LALTHANGLIANA, MINISTER : Pu Speaker, member zahawm tak Pu Lalmuanpuia zawhna kha, Aizawl khawpui chawhmeh zawrh dan kalphungte en fel a ngai nasa em em mai a, kan hria a. Kan Assembly House thlang maiah pawh Horticulture leh Agriculture Department building bul vel phei chu Inrinni zingah traffic-in luh phal loh tih niin, motor luh khap a ni a. Chubakah, Aizawl veng hrang hrangah pawh hian fur a lo ni ang a, kan chiaukawi nasa hle dawn mai a. Heng hi en fel ran chu a tul khawp mai. India ram khawpui thenkhata market pangngai tak tak an neih ang te hi kan awt ve

hle tawh mai a, a tul tawh bawk a. Heta tana hmalak kha sorkar hian a tum ngei turah ka ngai a. Sum hmuh dan tur kawngte tunah hian ngaihtuah mek a ni tih kha ka chhanna ni se.

Entirnan, tuna kan building ding lai mek te pawh vuak thiah theih loh chi, la tha bawk si te an nih phei chuan Chief Minister hoin kan la sawiho ang a. Thianglim felfai tha deuh, tih dan tur ah sorkar in ngaihtuahna a seng ngei turah ka ngai a.

Tichuan member zahawm tak zawhna neitu Pu Duhoma zawhbelhna lai kha a pawimawh khawp mai a. Serchhip hi District Head quarter a ni a, sumdawna lamah a bik takin thlai thar leh thil dangah hmun pawimawh, Mizoram-a kan hmun laili a ni a. Engpawhnise, sum ruahmanna kan la siam ngei turah ka ngai a. Amaherawhchu engtikahnge tih chu a sawi theih chiah loh a, District Headquarter khitiang khawpui pawimawh angah khi chuan hei hi kan tihmakmawh turah ka ngai a ni. Kan lo ngaipawimawh dawn nia tih kha ka chhanna ni mai sela a tha awm e.

Tin, PWD ram lak leh lak loh tih lai chungchang kha chu ka sawi theih a ni vak lova, khilai lawkah te pawh khian hmun a awm phei chuan a tha maithei. Engpawhnise, quarter kha tangkai taka an hman mek han laksak mai theih a nih leh nih loh te kha Department dangte nena sawiho ngai deuh a ni a. Engpawhnise, ti zawng hian sawi ta ila, market tha tak kan neih theihna tur atana hmalak chu tul kan ti turah ka ngai tiin ka han chhang ang e.

Tichuan member zahawm tak Pu Vanlalhlana'n a zawhna kha Leitan a ni maw khah? Aw, Durtlang Leitan kha, vertical extension niin ka ring deuh a, a awm tawh sa han tihchangtlun leh han zauh chhoh kha ngaihtuahna kan lo seng zui thei turah ngai ang.

SPEAKER : Starred Question no.14-na zawt turin member zahawm tak Pu Lalrintluanga Sailo i lo sawm ang.

Pu LALRINTLUANGA SAILO : Pu Speaker, ka lawm e. Chief Minister zahawm tak chhan atan ka zawhna te chu:

- a) West Phaileng-Marpara road hi engtikah nge black topping a nih?
- b) Engzatnge amount?

- c) Tunge contractor?
- d) Engtikahnge hna tan a nih a, engtikah nge a zawh ang?
- e) Maintenance period eng thleng nge pek a nih?

SPEAKER : Chhang turin a changtu Minister zahawm tak i lo sawm ang.

Pu ZORAMTHANGA, CHIEF MINISTER : Pu Speaker, kawng lam hi a pawimawh tawh angreng a ni ang e, a tuah tawh a ni ang e. A hminga House Leader nih chuan ka'n thumrawn tlut tlut mai ang e. Member zahawm tak Pu Lalrintluanga Sailo zawhna chhanna chu:

- a) West Phaileng – Marpara road hi kum 2011-ah black topping hna thawh tan a ni.
- b) West Phaileng – Marpara kawng siam nan hian ₹4894.09 lakh sanction a ni.
- c) West Paileng – Marpara kawng hi contractor 3in an thawk a, chungte chu :
 - i) Tantia Construction Limited
 - ii) F. Kapsanga, Tuikual
 - iii) Lalthanthuami, Chawnpui
- a) September 2011-ah contractor 3 te hian hna an tan a, Tantia Construction Limited-in 3.5.2015, F. Kapsanga, Tuikual in 30.4.2015 leh Lalthanthuami, Chawnpui in 31.3.2016-ah an thawk zo a ni.
- b) Maintenance period hi 'defect liability period' tih niin, thawh zawh atanga kum khat chhung pek a ni.

SPEAKER : Pu H. Lalzirliana, member zahawm tak zawhbelhna zawt turin i lo sawm ang.

Er. H. LALZIRLIANA : Pu Speaker, ka lawm e. Kawng bawk a ni e. Kan Chief Minister a rim tlah tlah hle a, a inthlahrunawm viau nain pathum/pali vel zawhbelh tur ka nei a:

- 1) Aisialkawn - Phaileng, Dr. Thangtea road an tih mai hi a tlang tawh a. Hmanah motor pawh a kal tawh a, tunah hian chhonzawm a nih tak loh avangin a phui leh khat tawh a. Amaherawhchu hei hi chei hnuma tlang leh mai thei a ni a, chu chuan Phaileng leh Mamit inpawhna kalkawng kha nasa takin a sawt a. Saw saw tihtlang leh ngei nan ruahmanna a awm em? Sum tam tak sen pawh a ngaih tawh a rinawm loh.
- 2) Dapchhuah - Rajiv Nagar, hei hi BRTF road a ni a. Dampa bialtu zahawm tak zawhna siamtu Pu Lalrintluanga Sailo nen khan BRTF hotute pawh kawmna kan nei tawh a. Tunah hian Ministry of Finance atanga an sum hmuh eng emaw zahin maintenance an bei mek a. Mahse kar kalta mai khan ka bial fangin ka zuk kal a, a progress a slow hle a, anmahni pawh ka remind leh a, anni sawi danah chuan he kawng hi an tan maintain a har a. Mizoram PWD hi hlanhhawn mai pawh an duh ni awmin an sawi a. Hlanhhawn mai hi a tha pawh kan ti khawp mai a, annin harsa taka an tih ai chuan. Chung chu thil tih theih chi a ni em? Enge ruahmanna te a awm tawh em tih kha ka zawt tel a.
- 1) Tin, Nghalchawm - University Road khu tlang lek lek, an tih chhuah tep a ni a. Khu khu enge hma lak tumna a awm em tih ka zawt a.
- 2) Gayatri Company-in tunah NH-44 'A' an thawk a, an bei mup mup a, thui tak an bei tawh a. Dampui hnuaiah khuan 600 meter bawr vel harsa tak mai beih mek an nei a ni. Hemi an kalsan tur Dapchhuah to Mamit tlang lehna 22.4 crore (SPEAKER : *I hun a tawp tlat, I zo thei em le?*) hi tunah enge kan thlenpui tawh, approval a chhuak hnai tawh em tih ka han zawt nghal a ni.

SPEAKER : Question Hour a tawp a, amaherawhchu a laklawh em mai a, midang 3-in in la phar a. Nichinah Pu Rokhaw kha i rawn phar hma in i bul ami leh i hnung amiin an rawn phar a, chutiang tho chuan Pu Rintluanga pawh khan a rawn phar a, ka dang leh dawn a ni.

Tichuan, zawhna kha a zahawm em mai a, a chhan theih ang ang chhang turin Chief Minister zahawm tak sawm ila kan duh tawk dawn nia.

Kan remti em ? Zawhna hun a tawp tawh a, a pawilo maw? Aw le, a laklawh a nih kha.

Pu ZORAMTHANGA, CHIEF MINISTER : Pu Speaker, sawi leh sawi hnu, department kan chang thar hlawt a, karkih tak tak, department-in information an lak hman loh han zawh thut thut, company hming leh a amount nen hian, a har khawp a, kum khat tal chu lo sorkar hman ila chuan kan hre deuh tur a ni a. Kan tum lut chauh a, a number leh eng emaw ah hian kan buai khawp mai a. Aisialkawn-Phaileng phui leh tawh kha, khulai kawng khu a pawimawh a, kan theihtawpin kan lo en ang a, kan tih tlang theih chuan khu khu Mamit panna short cut tha tak a ni a, keini pawhin kan ngaipawimawh a. Amaherawhchu kawng hi, Assam type in va sak ang ngawt a ni lova, a crore tel a ngaih avangin uluk taka central sorkar lam purin emaw, keimahni state-a kan tih dawn pawhin nasa taka sum leh pai pawh meet khawm a ngaih avangin, 'kha kha kan ti nghal ang e', tih ngawt chi a ni lova. Kan ngaipawimawh a, theih ang tawka hma lak kan lo tum ang e.

Tin, Dapchhuah - Rajiv Nagar kha, 'kan progress a zawi si a, maintain a harsa an ti a, PWD-ah hlan chhawn theih a ni em' tih kha, pawng hlan chhawn ringawt kha, an lo lak dan condition te, keinin la dawn ila engtin nge ni ang tih te, hengah hian thui tak biak a ngaih avangin kan lo indawr phawt loh chuan kan la thei mai ang tih ngawt pawh a ni lo ve. Engpawhnise kan lo enzui ang e.

Tin, Nghalchawm - University kawng pawh, khulai khu short cut a tha a, kei pawhin ralkhatah ka thlir tawh thin a, helai pawh hi a theih anga hma laka, a sial theih dan a awm chuan umzui zel pawh kan lo tum ang a. Tin, NH-44 (A)-a hma lak zel pawh kha department te nen kan lo en ho ang a, enge a dinhmun hnuhnung, tun ami enge tih kha, ka sawi ang deuh khan kei pawh a vaia han chhan mai theih turin kan la hre kim bik lo va, kan theih ang tawkin kan lo en zui ang e tih kha Pu Speaker, ka chhan theih chin ni rawh se.

SPEAKER : Ka sawi duh chu, zawhna & chhanna hi ni dangah leh hun dangah chuan rotation in department hrang hrang hi a awm a, chu mi niah chuan chu mi department tih a ni a. Tunah hian vanduaithlak deuhin kan ti dawn nge, Thawhlejni hian vawi 2 zawhna & chhanna a awm thei lo tlat mai a, memberte ram tan thahnem in ngai a, in zahawm si a, House Leader zahawm tak ka rawn a. Tichuan question zawng zawng hi kan 'clubbed

together' kan chhungkhawm vek a ni. Eng ni ah pawh ni hran bik siam lovin kan siam ta a, kha kha member hana zahna lantirna pawh a ni bawk a ni.

Aw le, vawiih hian member zahawm tak Pu Tawnluia...

Pu LALDUHOMA : Pu Speaker, question neitu bakah midang 2 tih kha niin ka hria a, vawiih khan 2 neitu pahnih kha i phal ta lova, 'question neitu bakah' tih kha kan ruling pawh ni deuh khan ka hria a, phalsak kha a va tha ve maw le, kan kal zel dan turah.

Pu LALCHAMLIANA, MINISTER : Arawn rawtna kha kei pawh ka support e. Question neitun Supplementary chang hmasa se, a bakah midang 2 tih a nih loh chuan a chep lutuk deuh e. A dik em, Pu Rokhaw? (PU KT. ROKHAW:A dik khawp mai)

SPEAKER : Pu Rokhaw kha ka en ran ran a, a phar si lova, Pu Nihar leh Pu BD Chakma ten an phar bawk si a, tichuan a zo ta a ni. Pu Rintluanga pawh a ka en ran ran a, midang 2-in an phar khalh si a, kan dang leh ta a ni. A tha kan tih zawk chuan question neitu chu a lehpekah chuan ni rawh se kan tih pawhin a tha tho e. Amaherawhchu, in siamrema inken te kha a awm thei a, kan rorelna kha a ni nuaih ang tih te kha a hlauhawm bawk si a, ka lo hria ang e.

Aw le, member zahawm tak Pu Tawnluia, Dy Chief Minister zahawm tak leh Pu Ngunlianchunga leh Pu VL Zaithanzama te vawiih damlohna avangin an lo kal theilo a ni.

Tunah chuan Laying of Papers kan ti ang a, Minister zahawm tak Dr. K. Beichhua kan sawm ang a, hengte hi House dawhkanah rawn lay se:

1. The Juvenile Justice Funds Rule, 2018;
2. The Mizoram Grant-in-aid to Voluntary Organizations and Individuals Rule, 2018;
3. The Mizoram Rights of Persons with Disabilities Rule, 2018;
4. The Annual Report of the Commissioner for Persons with Disabilities, the Govt. of Mizoram for the year, 2017 – 2018.

Dr. K. BEICHHUA, MINISTER : Pu Speaker, ka lawm e.

1. The Juvenile Justice Funds Rule, 2018;
2. The Mizoram Grant-in-aid to Voluntary Organizations and Individuals Rule, 2018;
3. The Mizoram Rights of Persons with Disabilities Rule, 2018;
4. The Annual Report of the Commissioner for Persons with Disabilities, the Govt. of Mizoram for the year, 2017 – 2018 te hi he House zahawmtak table-ah ka rawn lay e.

SPEAKER : A copy kha sem ni se.

Vawiin hian Bill pakhat ngaihtuah tur kan nei a, Minister zahawm tak Pu R. Lalthangliana kan sawm ang a, ‘The Mizoram Anatomy Bill, 2019’ hi House-ah introduce rawn dil se, i lo sawm ang.

Dr. R. LALTHANGLIANA, MINISTER : I remtihna leh he House remtihna, ‘The Mizoram Anatomy Bill, 2019’ hi introduce ka dil e.

SPEAKER : Introduce a rawn dil a, kan remti em? Kan remtih chuan House-ah ngaihtuah turin rawn move nghal se, amah i lo sawm ang.

Dr. R. LALTHANGLIANA, MINISTER: Pu Speaker, he House-ah Bill pawimawh tak mai, ‘The Mizoram Anatomy Bill, 2019’ hi ngaihtuah turin ka rawn dil e.

SPEAKER : A rawn dil a, introduce tur leh move turin ka sawm nghal e.

Dr. R. LALTHANGLIANA : Pu Speaker, ka lawm e.

SPEAKER : Ngawi rawh aw, khawngaih takin. Kan danah kan tih than angin clause by clause-a tih thin te pawh a ni a, lak kawp vek mai a pawl lo em? Engtinge ni ang, lakkawp kha a tha mai em? House remtihna ka zawt che u a ni. A nih chuan la kawp vek mai ang aw.

Dr R.LALTHANGLIANA. MINSTER : Ka lawm e. He Bill pawimawh tak mai hi Health & Family Welfare bikin hma a lakna mai a ni lova, Mizoram sorkar ang leh ram mipuiten kan mamawh em em

Bill vawiinah he House zahawm taka kan ngaihtuah thei tur hi ka lawm hle a ni. Pu Speaker, i chungah leh kan House Leader chungah leh member zawng zawngte chungah lawmthu ka sawi hmasa a ni e.

Kan hriat angin Medical College tiin kan sawi mai thin a, a lampum hi thenkhat chuan kan hrelo mai thei a, MIMER kan ti a, “Mizoram Institute of Medical Education and Research” tih a ni e. Nikum August thla khan hei hi hawn a ni a, a la reilo hle a ni. Tichuan, sorkar thar a lo piang a, naktuk hi ka hriat sual loh chuan thla 3 kan sorkarna chiah tur a ni a. Kan House Leader-in a sawi fo tawh ang khan thil hi thui tak bel lohna chin kan la nei a ni. Engpawhnise vawiina ka Bill putluh tur erawh chu han sawi mai khan a fiah mai thei turah ka ngai a ni. Rei lutuk sawi ngai lovin kan pass thei mai ang tih ngaihtuahna ka nei a ni.

He Medical College pawimawh tak hi nikum khan hawn kha a ni a, a DPR hi kan information atan pawh hian he House zahawm tak hi han hriattir ta ila, vaibelchhe 189 project a ni a. Tin, Medical Council of India (MCI) te phalna (permission) neia din a ni a. Amaherawhchu, chutih meklai chuan recognition ti tur erawh chuan kawng tam tak la zawh a ngai dawn a, a khat tawka min rawn enfiah reng ngai a ni a. Chungah chuan medical-in building tha kan nei em, hostel tha kan nei em tih te, engkim mai kha a rawn en uluk khawp mai a ni. Tunah pawh thla leh mai hian inspection an rawn nei leh dawn a, churang chuan ka sawi duh lai tak chu hetiang a nih avang hian vawiina kan Bill hi pass lo thei lo dinhmunah kan ding a ni.

Tin, Bill kan sawi hmaa ka sawi duh lawk chu, MIMER-ah hian MBBS zirlai 100 dah thei tur ang a ni a. All India quota-ah hian 15 kan pek a ngai a, NRI quota-ah hian 15 kan pek a ngai a, state quota hrim hrim hi 70 a ni. Tin, NRI quota hi 14 kan nei a, pakhat hi ban a nih avangin. A vaiin zirlai first batch, second batch kan tih ang hi 99 kan nei mek a ni. Hei hi hre tlang ta ila ka ti a, a pawimawhin ka hria a ni.

Tin, MBBS subject-ah hian first batch-ah hian a hawn tuk atanga function niin ‘anatomy’ kan tih, vawiina kan Bill thehluh lai tak department bik hi a pawimawh khawp mai a. Department pawimawh

tak mai kan neiha first MBBS subject a ni. Tin, Physiology tih a awm bawk a, Biochemistry tih hi a awm bawk a ni. Tin, second batch-ah hian pathology, microbiology, forensic, community medicine tih te a awm a ni.

Kan ngaihtuah tur pawimawh tak mai “The Mizoram Anatomy Bill, 2019”-in a tum lai tak hi Anatomy department bik hian Bill mumal taka a awm loh chuan zirna hi an kalpui thei lo a ni. A awmzia chu mitthi ruang kan lak dan tur te, mithi ruang atanga zira practical tih ngai ngei ngei a ni a. Chuvang chuan sorkar hmasa hun lai pawhin, a’n kalchhoh khan Mizoram-ah mitthi kha a remchang mai lova, West Bengal Health Services phalna hmuin mitthi ruang kha lak a ni thin a ni. A hautak khawp mai a, a dahna nen a vai khan ruang pakhat Aizawl a rawn thlen nan khan cheng nuai khat a ngai thin a ni. Ruang 10 tal a awm tur tih a ni a, hengah hian dan leh dun fel tak, Assembly rorelna sang bera legislatea kan tih loh chuan Medical College an kal thei dawn lo a ni. Chumi a nih avang chuan he Bill-in a tum hi kan circulate vek tawhin ka ring Assembly Secretariat lamin. Mitthi kan tih unclaimed-te an ti a. Claim tih awmzia chu entirnan – hospital-ah te pawh unclaimed dead body te kha a awm thei a, khawlaiah pawh mitthi ruang a awm thei a, dead body-te pawh zirna hmunah hian laklul theih chu a ni. Amaherawhchu, procedure fel tak helaiah hian a tih dan tur kalphungah khan chipchiara sawi a ngaih ka ring lova. Khami bik ngaihtuahtu tur a ngai a, Legislator-te pawh an involve a ngai a. He Bill hi vawiinah kan pass theih chuan a takin kan kalpui thei dawn a ni. Tin, nikum lama hawn a lo nih khan experiment atan a ngai si a tiin ka sawi ang khan West Bengal ami te harsa tak chungin kan zuk lak a ngai a ni.

Chuvang chuan he Bill hi a pawimawh khawp mai a, a hmanhmawhthlak bawk a ni. Assembly Session hi duh hun hunah a neih theih si lova. Pu Speaker, vawiinah hetiang session kan neihna hmasa bera introduce-a, ngaihtuah thei tura kan awm hi a lawmawm ka ti hle a ni. Chuvang chuan House member zahawm tak tak ten eng emaw hriatchian duh kan neih pawhin kan chhang vek theilo mai thei a, kan chhan theih chin a awm ang a. He Bill hi lungrual taka sawi hova pass theih hi ka duh hle a ni tih ka han sawi a ni. Ka lawm e.

SPEAKER : Aw le, ngaihtuah turin a rawn chhawp chhuak tawh a, a copy pawh member-te hnenah kan pe vek tawh che u a nih kha. Tichuan kan sawi ang khan a pumpuiin kan la ang a, clause by clause lovin. Member-te minute engzatnge kan inpek ang le? Ni e, subject hi mi nazawngin han chuk luai luai chi loh deuh te pawh a ni maithei a, chi deuh te pawh kan awm ang a. A tui deuhvin ngaihnawm taka thui tak thlur te pawh a awm thei a nia ti ru. Kan sawi tui dan azirin minute te chu inpe ve ila, minute 5 i ti ang aw. Mahse sawi tui dan azirin kan hawng zau deuh dawn nia.

Aw le, sawi hawng turin member zahawm tak Pu Lalduhoma i lo sawm ang.

Pu LALDUHOMA : Pu Speaker, ka lawm e. Minister zahawm takin a tulna leh a pawimawhna min hrilh hre tawh a, kha kha kan pawm tlang vekin ka ring a, sawi teh vak loa pass mai theihte hi ni nghe nghe sela tihte kei ka lo ngaituah dan a ni a. Minister pawh khan a Bill lam ai mah mah khan a institution lam kha a tuipui deuh em ka ti a. Kha lam kha kan hrut vak dawnte a nih loh chuan a Bill hrim hrim hi chu sawi tur tehchiam a awm lova. Delhi te, Karnataka te-a Anatomy Bill an neih kan entawn thui hle niin a lang a. Tin, Mizote hian ruang hi kan ngaipawimawh em em mai a, ni 7 te kan inzawng a, rimchhia pawh kan invui a, taksa bung ringawt pawh mitthi pangngai angin kan invui liam duh a. Ruhro thlengin kan zahin kan ngaipawimawh a. He kan dan neih tur hian Mizote'n mitthi ruang kan sawngbawl dan hi a rawn khawih danglam chuanglo bawk a. Tin, kan Medical College-ah zirlaiten an mamawh ngawih ngawih thil a lo nih avangin pass mai hi ka rawt a. Tin, mitthi ruang claim-tu awmlo kan hman tangkaina tur a ni a, mit donate te pawh hi tha ka ti a, kei chuan ka donate daih tawh nghe nghe a. Mit donate thleng hian kan hreh a, ruang lamah hian kan kal na mah mah ka ti a kan society hi. Chuvangin hei hi chu kan zirlaite mamawh thil a nih avangin a tha ka ti, pass mai ka rawt e.

SPEAKER : Pu Dr. Z.R Thiamsanga i lo sawm ang.

Dr. ZR. THIAMSANGA : Pu Speaker, ka lawm e, Bill pawimawh tak “The Mizoram Anatomy Bill, 2019”, Minister zahawm takin a rawn putluh hi pawimawh tak a ni a. Kei chu medical doctor ka ni a, ka lo zirchiang tawh a. Mihring ruangte pawh an chhip atanga an ke hmawr thleng

lo chansawm tawh ka ni a. Chuvang chuan vawiin hian a sawi awm ber pawl niin ka inhria a, hei hi mandatory, Medical College kan han neih takah chuan tun kan sorkar hian kan tihpuitlin ngei a ngai a, theihtawpa hma kan lak a ngai a. Chumi zirna atana pawimawh berte zinga pakhat 1st Year-in bul kan tanna mihring kan tih hi a pawimawh a, nichina Minister zahawm takin a rawn sawi tawh ang khan Kolkata atangtein kan han la chhuak a, a ruang man chu a awm lem lo a. Medical College hrang hrang Director te an zuk dil a. Amaherawhchu a process hi a thui ve a. Khami ruang awmna atanga an han inlak chhuah te; tin, thlawhnaa phurh man te, pakhat pawh singriat, nuai khat dawn lai a ngai a. Chuvang chuan hei hi a pawimawh a.

Tin, India Medical Council-in a duh dan chuan zirlai za zingah hian a tlem berah ruang sawm hi kumtin a ngai a ni. Tunah hian ka hriatsual loh chuan ruang paruk an nei tawhin ka hria a, pali an la mamawh a ni, tun atan hian. Chuvangin kumtin ruang sawm zirna atana an mamawh an rawn tihte pawh hi nakinah chuan kan phal ngei pawh tulin ka hria a.

Tin, kan hria a, India ramah mi tam takin, West Bengal Chief Minister zahawm tak lo ni thin Jyoti Basu ngei pawh khan tuna MLA zahawm takin a rawn sawi ang khan eye donation an tih ang deuhin an ruangte pawh kha an lo donate tawh a ni. Chuvang chuan keinite pawh hian bul kan tan a pawimawh ve awm mang e aw ka ti a, khatiang khan donate-te an awm thin a ni. Heng lai ruang unclaimed kan tih ho chi zawng zawngte kha MIMER-ah kan nei ang a. Amaherawhchu MIMER-ah sawn nei tur chuan cold storage-te pawh kan neih that a ngai ve dawn a ni. Cold storage lian tha tak nei ila; tin, chumirual chuan a dah thatna formaline tank kan tihte pawh hi tunah kan nei thei nachungin kan la tihlen a ngai dawn niin ka hria, he Bill hi kan pass chuan.

Minister zahawm takin a rawn putluh “The Mizoram Anatomy Bill, 2019” hi he House zahawm tak hian pass pui ngei a pawimawh si a, mandatory a ni a, ka rawn rawt a. Chutih rual chuan thil pakhat ka zawt ve lawk ang a, a pawl em lo ang chu Pu Speaker. RIPANS, Mizorama institution pawimawh ber pakhat saw kan hmang tangkai a, amaherawhchu keimahni sorkar ta a nih lem loh avang hian kan va inrawlh lo deuh em aw ka ti a. Chuvang chuan kan sorkar thar hian RIPANS hmasawna tur atan pawh hian hmalakna a nei em tih kha han zawh ka duh a ni. Pu Speaker, ka lawm e.

SPEAKER : Sawi duh dang kan la awm em? Dr. B.D. Chakma i lo sawm ang.

Dr. B.D CHAKMA : Pu Speaker, ka lawm e, medical science zirna turin 1st Year anatomy, physiology and biochemistry zingah anatomy hi a pawimawh ber a ni a, chuangin he dan hi ka ngaipawimawh khawp mai, chuangin lawmawm ka ti hle a.

Sawi tur chu ka nei tam em em lo a, Bill hi tha ka ti a, section 3 sentence hi incomplete deuh em aw ka ti a “ Notwithstanding anything contained in sub-sections (1) and (2) the authorized officer shall – helai hi chu blank a ni ta. Tin, sub number (a) When a near relative of then deceased person is known to be alive and he has failed to claim the body within the prescribed time for reasons beyond his control, or”

(b) “When the deceased person has prior to his death declared that his body shall not be subject to anatomical examination or dissection or both, hand over the dead body to such religious or public institution belonging to the religion of the deceased subject to such conditions as may be prescribed”. He sentence hi a la complete lo deuh nge ka hre lo a, “the officer shall” tih kha min sawifiah sak theih chuan, a bak kha chu a thain ka hria a. Minimum hi batch khat tan chuan 100 bedded hospital tan ngaihpawimawh a ni a.

Mizoram hi state te tak te a ni a, locally available chu a harsa mai thei, chuangin state pawn lam atanga lakluh theih dan hi a pawimawh khawp mai. Human dead body transportation hi a harsa lutuk a, natural death pawh state check gate-ah harsatna a awm thin a, dan tha tak a awm loh chuan harsatna a awm ang tih a hlauhawm a. Chuangin, ‘Mizoram Anatomy Bill, 2019’ hi ka support a ni e. Ka lawm e.

SPEAKER : Member zahawm tak Pu Lalchhuanthanga i lo sawm ang.

Pu LALCHHUANTHANGA : Pu Speaker, fimkhur thu hla-ah zawhna ang reng deuh siam ka duh a. Unclaimed dead body hi an past life kan hriatchian lemloh hi institution-a kan lo seng luh mai hi a him tawk ang em tihte kha rilruah a awm a, chu chu zawhna ang reng deuhin fimkhur thu hla-ah ka rawn siam a ni e.

SPEAKER : Kan sawiho ang khan a Bill hi a tha a ni ang e. Minister kan sawm mai dawn em ni? Chief Minister-in sawi tur a nei em, i lo sawm ang.

Pu ZORAMTHANGA, CHIEF MINISTER : Pu Speaker, tawite ka'n sawi ang e. Hei hi a tha khawp mai a, kei pawhin uluk takin ka chhiar a, a then hi chu tlemin a technical thil lai deuhte chu a awm a. A tlangpuiin layman tan pawh hriat thiam a awl em em a.

Pakhatnaah chuan hmun dang atanga kan zuk lei theihna turin mi ruang kan mamawh, doctor lamin an inzirna atana an mamawh kha hmuh theihna dan kawng awm zingah hmun dang ami an zuk lei te, keimahni state chhung leh hmun dangah mi ruang claimtu awm lo, Dan-in hei hi chu a claimtu an awm lova, tihian a awm ringawt a ni an tih chin a lo awm a nih chuan, chungte pawh chu lakluh theih a ni ang tih na dante chu a ni a. Tin, unclaimed a tih kha claimtu awm lo na na na chu khang kha chu hman theih turin tah hian a dah a. Chumi hunbi tur chu thuneitu ten tul an tih angin an publish ang a, an ko vang a, chumi chhunga 'a ruang hi ka rawn claim e' ti tu an awm loh na na na chuan, khang te kha chu lakluh theihna dan te a awm pawh kha a dik reng a, midangte tih dan tho a ni a.

Tin, hei hi kan mamawh em avang hian a tirah order-in a'n kal a, chutah ordinance-in a kal lo thei lova, kan ordinance pawh han kal mah se ordinance ringawta kal thei a ni lova, Dan-a siam a ngai a. Medical College-a doctor zirlai ten nitina an mamawh a ni si a. Chuvangin kan hmuh theih dan kawng kha phalna kan pek loh chuan sawta ruang lakluh ngawt kha a tih chi bawk si loh avangin phalna, Legislature-in Dan-a kan siama kan pek a ngai a, chuvangin chumi Dan chu tunah hian Minister incharge-in a rawn pulut ta a ni a.

Chuvangin, kan ngaihthlak tak ang khan keimahni Mizoram-ah hi chuan ruang claim loh ngawt hi awm ngai lo ang tluk deuhthaw a ni a. Amaherawhchu a lo awm palh thei bawk a, chuta tan te chuan khawilai ram dang daih ami eng emaw tia claimtu awm hauh lo ruang awm palh thei a ni. Chung te lakluh a nih theihna tur kha kan mamawh a; tin, chu lovah hmun dang atangin a tam ber hi chu kan lei in kan lalut dawn niin a lang a. Chuvangin doctor zirna tur te kan siam a, kan din chhuah chhoh ve si chuan kan tana thil pawimawh ber pakhat a nih avangin a dan kha vawiinah hian kan

pass sak thuai hi a tul a. Member zahawm tak ten chu chu a pawimawhna hriain vawinah hian nichina member zahawm takin a sawi ang khan a sentence kha kim lo deuh lai a awm em tih lam erawh kha chu enchian deuh hlekte chu a tul pawh a tul mai thei a. “The Mizoram Anatomy Bill, 2019” hi Health & Family Welfare Department hian an mamawh ngawih ngawih avangin member zahawm tak te hian pass pui kha a tha e tih tawi te in ka han sawi ve zawk a ni e. Ka lawm e.

SPEAKER : Aw le, a pawimawhna te kan sawi liam liam a, Bill neitu kan sawm ang a. Tin, eng emaw han zawhna ang chi te kha chhan a har deuh mai thei a. Tin, patent error te pawh a ni mai thei bawk a, aninrawn wind-up sela, passrawn dil nghal mai se a tha ang e. Tunah Dr. R. Lalthangliana, Health Minister zahawm tak i lo sawm ang.

Dr. R. LALTHANGLIANA, MINISTER : Pu Speaker, Dr. B.D. Chakmarawn sawi lai kha, ‘shall’ tih hi sub-section (b)-a ‘hand over the dead body’ nen chhiar zawm tura sub-section (a) leh (b) thenkhat hi khatia tih kha a ngai a. Kan lo siamrem dawn nia, khalai kha chu, a harsa lovang, a thuah khan kan Chiang thei maiin ka ring. Tin, ‘unclaimed body’ tih hi mitthi hi darkar 72 thlenga claim tu an awm loh chuan dan in ‘unclaimed’ body tiha declare theih a ni tih a ni a.

Tin, an past history kha chhui chiam chiam tur a ni lem lo, a pawimawh lai ber chu formalin an ti a, a chiahna kha a awm a, kei pawh hman deuh khan ka kal tawh a. Kan member te pawh hian va hmu ve ula ka duh ang reng khawp mai a, mahse haw lam hi chuan chaw ei chu a tui duh lo khawp mai a, mitthi an chan sawm han hmuh chuan han insan ruh deuh te pawh a ngai khawp mai.

Tin, a chiahna pawh kha ruang dah thatna an ti a, ‘formalin tank’ an ti tain ka hria. Kha pawh kha a awm sa vek a, tunah hian MIMER-ah sawn neih sa tawh a ni tih hre ta ila a that ka ring. A hrim hrimin, khatiang mithi ruang tute nge an nih tih hriat chian mang loh, tu emaw eng emaw rinhlelh ang chi lai bawrah hian he lai kan Bill-ah hian kan chhiar uluk chuan thil kalphung eng emaw neuh neuh kha a awm a. Entirnan, mitthi te hi an thih dan ah Chiangkuang mang lo emaw, khatiang thil a awm a nih chuan officer ruat bik kha an awm ta a; tin, police te pawh kha an involve ta a ni. Tin, eng emaw tul tih a post-mortem tih ang chi te pawh kha tih theih tho a ni a. Amaherawhchu

dan leh dun fel tak min khungtu kha a awm a ni, kan sawi zel chuan a rei dawn a, a tul lo ah ngai ta mai ila.

Kan medical seat kha nichin khan ka sawi sual chiah lo va. Amaherawhchu, 99 chiah kha tunah hian student kan neih dan a ni. NRI (Non-Resident Indian) khan quota 15 an nei a ni. A tirah chuan 15 chu a ni maithei, pakhat kha a bang ta niin ka hria.

Tin, MIMER-ah hian doctor 106 an awm a, Professor tha hi hmuh an har ve khawp mai a; mahse, eng emaw ti tiin a thawktuten thahnemngaihna nasa tak an nei a, dan leh dun mumal lutuk anga kal hleih theih loh chang entirnan, single window clearance te pawh kha sorkar hmasa khan a phalsak niin ka hria a, khatianga han lak tawp tawp ngai ang chite pawh kha an awm a, Professsor hi 20 an ni. Tin, sorkar hmasa ah te pawh quarters tam tak kan lo sakte pawh kha luah a ni ta a ni. Quarters 224 awm a, functional department bik hi tunah hian 18 a awm a ni.

Tin, Dr.Thiamsanga khan kahpah deuh hlek khan RIPANS kha a rawn zawt a. RIPANS hi centrally-funded institution a ni. A lam pum hi “Regional Institute of Para-Medical & Nursing Science” tih a ni a. Chief Minister bial hi a ni a, a ngaipawimawhin ka hria a. Thu lawmawm deuh mai tun hnaiah hian a awm a, House han hriattir a tha ka ti a. 2012 bawr vel ni ta in ka hria funding lian tham kan hmuh chu, tah khan vaibelchhia 68 hmuh a ni a, chumi hnuah chuan hmuh a ni ta mang lova. Amaherawhchu ni 27, February thla khan he institution hi 100 beded hospital ni turin phalsak kan ni ta a. Chu bakah, economic block lian tak sakna tur te, indoor sports complex te leh auditorium te, guest house sakna tur te, general hostel block te. Tin, 100 bedded hospital kan neih belhna tur te leh resident doctor quarter ngawt pawh hi 22 min rawn phalsak a. Tin, Medical Superintendent quarter leh staff nurse quarter hi 20 dawn lai min phalsak bakah new course hi Pu Speaker, a lawmawm khawp mai a. Saw laiah sawn post graduate course tunhnaiah kan tan thei dawn bawk a ni. Sorkar tharah hetiang thil a lo thleng hi ka lawm khawp mai a. New post hrim hrim faculty professor te, associate professor te leh post dang neuh neuh 154 phal sak kan ni a. Hei hian doctor, nurse leh pharmacy a ni deuh ber a ni. A vai hian Pu Speaker, a ropui ve riau mai a. Chief Minister bial chhung ami

a ni a, ani pawh hian a vei hle mai a. A hmalakna kan tilo thei lovang a. February ni 27 mai khan vaibelchhe 480 Govt of India, Ministry of Health & Family Welfare atang hian kan hmu a ni. Vaibelchhe 480.12, nuai hlir hi nuai 48,112 a ni a, a tam viau a ni. Chuvang chuan kan Chief Minister pawh ama biala thil thleng ropui tak mai a ni a. Hei hi a lawmawmna em em chu 100% funding a ni lehngal! Engmah state sorkarin kan tum tur a awm lova. A hmun sawn min zo ang em aw tih kha ngaihtuah mek a ni. Tah chuan zirna thar kan neih tur hi nursing tihna tur te, MLT, (Medical Laboratory Technology) zirna te, RIT (Radio Imaging Technology) zirna te, ophthalmic technology, mit lam zirna te, Bachelor of Therapy zirna te kan lo neih mek kha khatianga sum kan hmuh takah chuan formalise niin M. Pharm. kan zirna te leh Diploma in Nutrition & Dietetics te kha a tel dawn a ni. Hei hi thil lawmawm tak a ni a, sorkar thar hian Medical Institution-ah, medical sector-ah hian nasa takin kan Chief Minister ho hian hma kan la a. Amaherawhchu, thil tam tak tihtur thar awm zel turah ngai ila.

Tichuan, he Bill pawimawh tak ‘The Mizoram Anatomy Bill, 2019’ hi he House zahawm tak hian min pass pui turin ka ngen che u a. Vawiinah tam takin kan sawi lo na a, a sawitute khan he Bill pass lo zawng, rem tilo zawnga sawi pakhatmah kan awmlo kha a lawmawm ka ti a. Tichuan he Bill hi he House hian a pass turin ka ngen nawn leh a ni. Pu Speaker, ka lawm e.

SPEAKER : Bill neitu Minister zahawm takin pass a rawn dil a. House ngaihda kan la ang a. ‘The Mizoram Anatomy Bill, 2019’ hi pass remti apiangin ‘remti’ ti rawh ule. (MEMBERS: Remti) Remtilo kan awm chuan ‘remti lo’ ti ula. Remtilo kan awm lova.

Tunah chuan ‘The Mizoram Anatomy Bill, 2019’ hi he House hian lungual takin a pass ta a ni.

Dr. R. LALTHANGLIANA, MINISTER : Pu Speaker, ka lawm e.

SPEAKER : Aw le, vawiina kan Business chu kan zo leh ta a. Kan chawl tawh ang a. Naktuk ni 15 zing dar 10:30-ah kan thukhawm leh dawn nia.

Sitting is adjourned. (12.15 pm)